

學

福

齋

詩

集

學福齋詩集卷三十三

雲間 沈大成 學子

竹西詩鈔

戊子春夕同俞楚江韓念齋集兩峰朱草詩林遲  
堯圃玉井不至

良宵良友聚把酒快論心但覺燭枝短寧知更漏深巷  
南人不至硯北句堪吟  
酒間讀楚江梅花詩聞說江梅圻相期策  
杖尋

燈節前一日陳對漚閔玉井易松滋吳牧田徐莪  
農集學福齋

唐荊川詩集卷三十三  
昨夕已上燈江城尙風雨晨起鵲吱喳晴光滿庭戶提  
壺貰鄰家折簡呼吟侶諸公皆詩豪健筆挽牛弩東皇  
挾春來梅萼坼園樹冷香暗襲衣玉妃若可睹自顧疲  
津梁未得樂桑苧幸多素心人把酒堪與語數卷蠹蝕  
餘莫笑寶陳腐叢殘篋底書飽嘗味甘苦

二月二日偕同吳堯圃閔玉井易松滋俞楚江羅  
兩峰放舟蜀岡作

柔艣狎春波晴景開曉暈白雲彌望深瑤華漸欲近嘉  
友陶良辰妍談啓真蘊邇迴拉蜀岡倦眼頓爲拄幾株  
野水邊孤冷更含韻底須讀仙經且共酌芳醞歐蘇雖

云遙風流猶可問歸塗縱上燈吟興終當奮

淨香園作

一湖新水綠平隄烏榜沿緣雙漿攜只有名園春最好  
梅花如雪石橋西

波浮孤嶼嶼圍花無數紅梅望似霞多謝東風解人意  
吹香渡水逗臆紗

筍輿才下卽登舟過盡長廊更小樓不分青青堤畔柳  
肯輸張緒擅風流

萬枝燈火一潭星欲揭花光上翠屏便使巖城皆下鑰  
第教沉醉不教醒

送江橙里之新安

掛帆恰趁曉天風一路看山過浙東北固江聲吟筆外  
西湖柳色酒杯中良朋暫別尤情切故里重來與客同  
記取鱖魚初上市盼君歸賞雜花紅

次韻奉酬汪西顯徵君見柬之作

漢庭經學比轅公宋代文章似醉翁身隱仍爲逸士傳  
義高真有古人風名山大業雖難匹短策清游可許同  
邂逅紅橋重買醉與君吟向夕陽中

寒食日杜補堂張紹村閔玉井汪對琴程筠榭易  
松滋恬村秋澄張漁川秋芷松坪集餞樗園分韻

賦詩因以留別

春風欲送客歸家  
良友相攜泛紫霞  
槐火異鄉逢冷節  
柳絲芳榭襯桃花  
西津水淺江聲小  
南浦舟移日影斜  
暫別亦應牽夢寐  
蓬牕回望白雲遮

春暮初歸及門翁石瓠張淥溪花農徐鹿樵汪西  
村林南村過飲荒齋以安得思如陶謝手分韻得  
手字

初歸及暮春綠陰暗深柳吾黨二三子分張亦已久相  
率來衡茅言笑重握手翦我園中蔬開我牀頭酒列坐  
細斟酌不覺月在牖緬懷漢代儒嘉惠良爲厚俗學繼

三才圖會卷之三  
三  
鵬之古義亡八九豈乏出塵姿如蘭漸以滌所期同心  
人遺經共墨守麗澤堅磨礪規過迅砭灸庶幾趨一塗  
或可離諸垢自媿老善忘曷以供鳴扣瑣碎辨鱸蠶擺  
脫埽迅風勿嗤此小言且起引大斗

過吳示姪尊樸

吾姪才何逸吟詩有古風章成千韻速氣壓萬夫雄客  
路春波綠旗亭酒淺紅今朝須盡醉明發去怱怱  
起柁又將別頻年作客多虎山徒悵望鶴市幾經過白  
髮看如此青衫柰若何跨騰期小阮莫亦嘆嗟咤

亡友惠微君授經圖四十六韻

烏嗥我執友器宇猶儼然豈伊松柏姿而無金石堅束  
帶爲再拜氣結不能言黃壚嗟以闕忽十有一年斯人  
竟泯泯吾黨宜昏昏憶昔歲癸亥余時客吳門始叩紅  
豆齋老樹上參天詩書塞牆壁几榻羅丹鉛忽忽便別  
去未及相討論曠隔逾數稔寢饋恒惓惓淮南盧使君  
調雅雨都轉縉衣禮名賢萍踪偶邂逅握手申前歡兄居屋

東上余止舍西偏因得共晨夕相與紬典墳生平憎俗  
學於古性亦敦自奉我兄教日聞所未聞益知埽枝葉  
漸能窺根原盡啓篋中藏闡發超後先至道不終祕皇  
矣寄所宣若陟高峰峻若泛洪濤寬若厓投良劑若饑



獲飽餐不才抑何幸積載從周旋兄尤愛治易漢學絕  
復傳所著周易述五緯昭星躔足令輔嗣詘頓使荀虞  
尊當其精思時往往夜不眠惜哉撰未竟二豎來爲患  
鳥丸盛業不得究抱志歸窮泉

兄絕筆於下經之革

兄屹持介節

方正不可干有欲爲之地寧守黔婁貧

當時貴人將特薦者兄以疾辭

都轉爲謀娛老計兄又力辭之

今上崇六經諸生求服虔公車病不赴物望歸徵君厥  
初迦祖禰其後子暨孫四世傳經學孟喜洵隨肩卽觀  
此圖中庭訓何其勤況有羣弟子璠璣多席珍至今胥  
江上芳躅準河汾朋友道喪久知已今古難回憶舊游

處情好逾弟昆疾革我奔問舍經無它云幽顯路雖隔  
誣諉語猶新後死者之責此盟安敢寒披圖恍若接恕  
先宛在焉誰更勸吾學誰相定吾文哀哀山陽笛悽愴  
摧心肝覩縷不能休漬墨皆淚痕

江楹里招集淨香園池上同拈月字

置酒臨平池青蒲可攬結巨魚闖新荷激水互潑刺五  
月暑將交搖箴御絺葛密雲久不雨枯槁力苦竭觀師  
爾何哆豐隆氣欲奪仰首望曾霄皎皎上明月河漢高  
微茫衆星粲以列我初渡江來握手話難歇四坐卷波  
暄三更歸舫絕將去引數卮莫笑老羌渴

五月十四日偕同西顥對漚見川集嚴春林樊園  
寓舍以日長如小年分韻得年字

公府旣知局塵事亦每牽一月幾相見相見倍歡然主  
人喜客至移牀近檐前洗卮開陳酌治具烹芳鮮是時  
夏已甚午風聒鳴蟬艷艷安石榴紅綳婚遠天男兒貴  
得志農夫求逢年酒酣起歌呼火故切日晏還留連

喜見川至自武林卽同此集因以遊子何日至分  
韻得何字

四座莫行酒聽我緩聲歌良友昔分攜春帆拂烟蘿今  
茲重握手銀塘翻風荷愴別寧在久一日卽爲多冰夷

坐偃蹇潮汐縮江河中田已龜坼此語豈傳訛君自浙  
西來新秧果如何吾硯亦望澤安得沾滂沱

獨酌成詩

泛此盈尊酒遺我獨夜愁颯然庭階間時序已初秋蟋  
蟀東壁鳴河漢方西流羲和不停御年光去以邁一笑  
逐逐者輪蹄不知休何如掩關臥晞髮向林邱豈曰富  
貴輕所尚志意脩先聖遺篇籍足以供冥搜我欲呼杜  
康與之相勸酬

熱

天旱久不雨火雲燒日紅無因逃畏景何處濯涼風捉

扇深宵後敲冰正晝中虛傳繁露學蜥蜴惱兒童

時方請雨

### 移寓彌勒菴

一笏堪容膝茅菴亦靜便苦空僧是伴寂寞日如年  
追暑憑杯酒忘憂把簡編焦原驚炙足何似佛香前

### 江松泉汪雪礪先後見過

屏跡甘離索跼然有足音談餘旛影動坐斷佛香深  
閑雨憂農事浮雲會道心秋陽今歲烈高樹亂蟬吟

### 七夕遣懷

寂寥僧舍晚銀漢露華流有句參寒拾無心問女牛  
微風將餞暑細雨欲成秋大巧何如拙閑居得自由

黃海查教授過訪

故人久不見今得異鄉逢  
暫弭橫江楫來尋倦客蹤  
宦情甘苜蓿詩句采芙蓉

辱示近詩

可惜匆匆別翻增離思濃

遣愁

衰白仍爲客蕭閑近似僧  
多情唯故紙長物有枯藤  
塵累牽難斷名山去未能  
都除文字習息意向傳燈

喜晤淮安陳別駕

陳爲河督恪勤公之孫今長蘆都轉學山先生之子

家世爲廉吏題輿正妙年  
仍來行水地偶放渡江船  
遺愛謳歌在新猷道路傳  
津門雲樹隔北望夢常懸

渡江

雞唱開瓜步人聲近蒜山千帆紅日外一塔白雲間波  
浪增秋汎風塵慘客顏何如垂釣者安坐石磯閑

舟阻

舟停連百里無路到梁溪邪許爭微罅艱難拔淺泥竟  
虛秋水至坐見夕陽低安得霖三尺歡呼起舵齊

到家

風利帆飛速侵晨已到家撚髭兒女鬧握手友朋嗟四  
壁秋蟲語一庭蚤桂花老懷差可慰鄰酒許頻賒

斜塘

怒濤黃浦尾水氣接滄溟蟲語誼荒岸漁燈簇遠汀飄

零驚愕夢浩蕩指浮萍正值潮將上推篷倚醉聽

洙涇

金山縣署移此

原野今成縣村墟多聚船重來猶隔日未到幾經年小  
市堆魚蟹荒祠湊管弦萬安橋下過急浪向浮天

楓涇

冠蓋通三浙楓溪舊有名菱塍綠岸轉蟹簍刺船鳴宿  
草荒墳感謂亡友浮雲倦客情夕陽看欲下蘆荻滿秋

聲

禾中謁錢香樹宮傅卽席作詩見示依韻奉酬

東山陪謝傅隔歲若爲期桑落深杯泛槐庭晚景移蒼



茫思往事傾倒誦新詩老去耽禪悅  
棲嚴有導師

禾中棲嚴

寺有徑山南藏  
本余將求之

尋倦圃呈主人汪梅溪

石橋秋樹陰徑轉一泓綠倦翁逝已遙  
此地遺幽築主人方晨興叩門驚剝啄  
茗盃及香鑪左右來相續紛紛  
青松枝樹義元以邈因知智者心如珠  
穿九曲庭中木樨香悠然微有觸  
當時曹與朱謂秋岳竹垞兩先生  
騷雅互揚摧勝地得替人高曠  
脫拘束禪味出醍醐野意狎麋鹿  
寂寥金甌館松風戛鳴玉願和寒山詩  
共禮迦維足

學福齋詩集卷三十三終

學福齋詩集卷三十四

雲間 沈大成 學子

竹西詩鈔

中秋前四日雷松舟明府招同范瀛山楊柳汀集

飲署齋分子字

秋晴故足佳秋陰亦可喜乘茲天宇涼相從飲於此漉  
漉蟾兔魄清光宜如水望舒御何遲宿留猶海底肆筵  
肴駢羅沾箸芳以美酒酣起拇戰勇力鬪蒼兕使君珪  
璋姿嗜學綜諸子發言莊或寓陳詩苟每佹邈焉莫與  
偕消搖溯厥始兩兄皆作手波屬更雲委推激到風騷

采擷悉蘭茝分題拈強韻落筆驚疾矢紛吾老而倦目  
眩不能視披衣出門去莫雨滑道矣

中秋夕有懷鶴亭主人

久斷淮南使遙懸江上心清光空似水良訊貴逾金大  
地無偏照寒蛩不住吟年年今夕會簫鼓入雲深

題張恪賓松陰覆局圖

崇山壁立積翠重中懸匹練波光動奔流轉石喧如雷  
秋氣颯爽入毛孔亭亭磔硤雙古松鱗甲之而矯獍龍  
寒光一抹駐微月直幹五鬣來長風誰其奕者澹蕩人  
丰儀朗徹炯方瞳斂衣晏坐覆舊譜天星散落猶能數

楸枰之上魚復圖鳥虵出沒若可呼揮闔飛箝合變化  
掎角因壘窮揣摩英年妙手已如此勝故欣然敗亦喜  
心超局外回風雲齒冷人間競梟雉征鴻昨夜鳴江城  
懸知池館加幽清行當策我邛竹杖來聽松陰敲子聲

與王史亭步入超果寺作

行散入蘭若秋氣蕭以森鴨脚數十株斧斤苦相尋石  
闌影漸稀宋寥杪樾陰物情有凋謝寒蟬時一吟乃知  
盛衰理達者無古今同參感支許遺俗慕向禽聞見媿  
井坐才力虞鼓儻幸得城南友鄭學亦沾沾一洗陋儒  
陋未怪潛夫潛涉獵及梵筴近共繙華嚴今茲來初地

三才集卷三  
半字證瞿曇浮雲出變態飄風留餘音容與不覺久齋  
鐘沉前林

史亭過訪偶見架上華嚴經贊歎希有因舉相贈  
遺詩報謝依韻和之

吾老好佛雖烝沙栖心二嚴及法華廩秋小極閉關坐  
頽景往往臨窓斜城南故人玉堂客晨夕來尋不我遐  
落筆縱橫闢詩圃抽帙歷錄繙經葩蒼茫望古毛髮動  
感慨話舊冷齒牙近亦觀空愛貝葉結習一掃參維摩  
圓頓之旨經中王清涼義龍譯烏荼散脂藥又下訶護  
波旬婆羅爲咨嗟新疏廿軸高插架歡喜贊歎毘盧遮

老夫便舉脫相贈快意何異鳥爪爬知君前身卽澄觀  
才供二筆爛重赧須彌山等亭歷子興事咄咄堪矜夸  
大滿禪師持般若樂全先生獲稜伽出酪出酥出醍醐  
爲香爲鐙爲雨花十四字貫億萬字凡將滂喜徒紛拏  
俗學爭鳴類狂象陋儒自棄成睡蛇華嚴世畱香水海  
仁者微笑此作家早晚西風送征雁還同載酒呼孟嘉  
題伯舅張實甫先生遺照二首

先生丈人行

胡浪切

風雅宿所師卽今瞻遺象宛挹松栢

姿泊然屏諸想希夷露天倪念彼壽者相示我杜德機  
治經孫叔然稱詩謝元暉書畫入逸品蘭藻紛葳蕤平

生濟物心餘伎及軒岐大名滿輦下羔雁爭致之脫略  
公卿間屢失尙書期中歲喜禪宗樹義追宗雷上巳水  
邊酌良辰花底杯音聲爲佛事遠近傳清辭偶放孝廉  
船消搖升平時歸來臥蓬華白業聊自怡晚證耆婆天  
甕甕長眷垂誰謂此圓光崔嵬蓮花臺

憶昔長安游倂倂媿忭愁恭承長者眷提挈闕文囿貝  
多性亦航或從相擊扣何似問藥山庸詎參雪竇松枝  
偶一揮名理奔輻湊有子胚前光多文以爲富幸得託  
葭孚比復締姻媾弱息歸賢孫門材蔚深秀蓬蒿雖不  
除蘭茝良加茂紛吾老無能萍梗困馳驟彈指遂隔塵

撫迹因感舊典型猶未遠鑽仰忽前後自嗟鉛槧勤徒  
閱烏兔走韜筆卷還圖牕外西風吼

重陽前六日史亭偕及門徐莪沚吳芸閣張淥溪  
花農聳文山集瓜牛廬以江涵秋影雁初飛分韻  
得飛字

秋深日色薄夕陽冷柴扉舊雨四三人半已御熟衣江  
城霜信早磊落雙螯肥隣家貰濁醪一杯聊與揮喜聞  
禾將登豐稔近歲稀幸際黃虞世常得免寒饑出門唯  
所適言笑各忘機暫歸足會意親故情依依西風入前  
林木葉隕以飛急節若轉轂爛醉未爲非



吳積園新闢精舍種菊滿畦重陽將近風雨未開  
見招飲集且訂後約卽席得句

勝地何必多把茅結野屋瓏玲石數株澹沲水一曲彌  
望立雲峰蕭然遠塵俗主人羅含徒繞舍皆松菊時節  
將重九風雨鎮相續寂寥東籬下霜萼苞猶束曰俟黃  
花繁還當招近局聞此喜欲旋讀去聲拍浮苦未足月黑  
撈蟹堅天清過雁連我再扶杖來題詩滿青竹

九日風雨把酒獨酌有懷鶴亭主人及廣陵朋好  
天公敗人興九日偏風雨跬步不能移寂寥掩蓬戶淙  
淙瀉檐瀑徹夜還過午呼童儲新泉甕盎列庭廡噫噫

鳴雁哀秋氣入平楚微霜已戒寒故衣行當補老妻知  
我愁爲我具酒脯言念廣陵游停杯觸離緒雲樹隔薊  
門東道尙逆旅寤寐猶相思二三舊吟侶去年壺觴歡  
今歲關河阻時光直流電人生等輕羽富貴曷足憑牛  
山柰何許

余於中夏至揚始聞淨慈明公二月順世之信雖  
方外交深爲之隕涕旋因多故哀挽未作雨牕無  
事追哭以詩

凶耗何淹久西歸已數旬湖山荒舊約露電失前因鄭  
重尋遺札分攜憶隔春因緣原幻合同是夢中身

余於  
去春

別師湖上歲暮遠承惠札

賜紫承

天詔傳衣禮法王刹竿臨濟席鐙影贊公房示寂悲雙

樹編詩動十方空齋懸白拂記荊豈能忘

師前札附寄拂子距其但

化僅隔一月

猶憶西溪上相邀共看梅月中攜笠走花底棹船回陳

迹留圖在良游覓句來幾時親埽塲重踏白雲開

去春師招

游西溪看梅復爲寫圖題詩其上

大覺雖無著忘形見性情多生香火願半世鷺鷥盟獨

夜飛鴻影空庭落葉聲遠公不可作彈淚向寒檠

謝閣學枉駕見過

昨夜燈花喜今朝車騎過酒沽村舍薄菊放晚秋多詩  
筆飛蘭藻風流被澗阿一編行不釋永日共摩挲

老友趙涵碧頻餉酒蟹

珍腴頻相餉高情孰與同波浮盈琰綠膏塞滿匡紅老  
至交仍固程遙問屢通幾時移短棹來醉草堂中

初寒集張蘅臯澄天書屋

西風作初寒落葉卷地走障面扶短筇高齋容我叩甲  
第肇問卿堂構閤以久主人昨遷入埽除猶縛帚娟娟  
東籬花紛披爛牕牖尊府飛鴻翁宿託忘形友城南梅

花園每歸必命酒世好君克敦復此酌大斗紅玉擘巨  
螯黃芽翦新韭夜深燭屢易城鼓三更後老夫徑沉醉  
不能辨誰某霜氣射徹裘禁冷捉襟肘

題張訥齋六十小照卽以爲壽

吾友齒六十駐顏仍如少諦交託投分高齋幸常到棋  
局接笛牀酒鎗雜茶竈瀟灑謝塵勞掩關愛卻埽或倚  
花塢筇或放石湖櫂勝引恣盤桓佳山共吟眺矯掌陵  
紫烟高懷曩幼眇今當覽揆辰游戲圖其貌蒼然松栢  
姿頰上添毫妙三秀茁蘭芝文采蔚班豹隔歲已交春  
巡檐梅花笑冷香散東風寒蟾流玉照安閑卽是仙何

必羨壺嶠君家張紫陽把袂引同調耆壽未有涯豈弟  
神所勞

重集積園齋中看菊卽用前韻邀王史亭庶常吳  
寬夫孝廉同作

言尋黃花約重闖綠杉屋疎林蕭以森脩廊繞而曲老  
兄泉明流地闢取避俗吸彼釭面酒掇此籬根菊良朋  
幸偕來嘉會喜載續縱譚恣洗洋忘形脫拘束絕勝婪  
尾宴欲啜軟脚局三萬六千場吾醉何能足所悵扁舟  
僦江上去帆速抗手謝主人月在幽澗竹

奉和鶴亭主人寄示九日出古北口作

東走灤京出白檀邊城九月朔風寒重關霜曉搖鞭度  
絕塞秋光立馬看每爲長征勞夢寐恰傳近札報平安  
歸來尙有黃花放好拂緇塵續古歡

壽興化李道園七十

兄年今七十我亦六十九兄尙蟠木容我老成俱醜憶  
昔白下門邂逅結石友力洗俗學陋志欲薙董蓰走筆  
奔雄詞璀璨堆瓊玖前輩遇王公

謂晴江先生

獎飾稱善誘

掀髯起藉賞吐語殷戶牖紛吾質最魯操觚謬隨後大

匠顧枉材長物珍敝帚偶然哦小詩往往在人口

志局同詠

長于塢燈余詩謬爲諸公見許

一別四十秋遑覺歲月久仍攜三寸錐

未綰半通綬拊迹徒蒼茫相顧竟何有男兒旣讀書所  
期垂不朽穿穴經史中丹墨寧離手高密墜緒湮千載  
失授受老兄我同心幸共此擊攸好學斯爲福逸莊子名  
是無窮壽劉賓客詩願舉而祝兄兄爲然乎否夕陽冷烏衣  
前游幾回首珍重自在身瀟灑離諸垢覽揆近子半寒  
牕朔風吼曷以佐兄歡凍醪酌巨斗

寄懷江玉屏

故人旅況近如何尺素殷勤託鯉魚新徙小園庾信宅  
舊存秘本蔡邕書吟情爛漫知加倍豪興縱橫羨未除  
更喜中年頻得子從今家寶有璠璣



恩恩爲別又經年吳越相思悵各天魑魅爭光幽室裏  
蛟鼉踏浪大江邊餘生息影逃禪窟儉歲遺憂到硯田  
唯有西湖忘不得還當重試僕夫泉

吳堯圃采菊圖

隱君與叢菊其性同孤潔羅含傍松栽陶潛挹露掇古  
人每好之皎然立介節萬卉凋嚴霜黃華獨葆質乃知  
天地心所以勵庶物吳翁天機精六法羣詫絕山水盪  
奇懷烟雲翔健筆倪黃沈董流揮霍紛可悅有癖躋柴  
桑意致何閑逸此圖集衆長秋光滿衡泌翁也神仙侶  
高步笑罷鼈蚩蚩夸毗子俯視等螻蟻與余文字交年

來迹轉密詩富宗門參禮豈我輩設翁年將八十剛果  
而堅栗發論傾坐人豪上不可遏底須駐顏方安用鍊  
藥說采彼籬根花翫此指端月

哭南屏讓山長老

西湖今寂寞頓失兩詩僧

方丈焚公先於春初示寂

翰墨陵洪覺禪

宗接惠能空山留一舫

師所栖曰山舫者梁文莊曾顏其楹

遺教散千燈

師開法龍翔弟子得度者甚衆

話墮傳緇白桑門得未曾

師著有話墮三集中刻余

倡和詩

蓮社高賢後如師更幾人白衣從結夏紅槥共嬉春河  
渚看梅日臯亭待雪辰到今都夢幻含睇莫江濱

客歲來湖上重聯銚拂蹤譚深春水舫坐斷夕陽鐘雲  
截層嵐翠風低曲岸葺記師曾指示來去自從容  
我生耽白業方外幾交游豈料存亡感翻驚歲月邁蟲  
肝空有喻雞足杳難求一矧山陽淚還爲支遁流

題友人秋林讀易圖

易因王弼久沉湮盡廢荀虞黜古人一畫以前成射覆  
九師之後失傳薪昏衢誰更能尋路斷港無由再問津  
君若研求先象數漢時授受本來真

晴綺軒對雪分暮字同張看雲閔玉井金機亭方  
竹樓介亭橙里主人作

天風吹飛雪一昔積芳圃頓使老石頑突兀堆壁瑤良  
友招我來入座多舊故圍爐環盃尊暝氣回窮近同雲  
冪高空逡巡日向暮滕六太顛狂撲簾不肯住團團鵝  
毛浮漾漾柳花聚徒念等梅人難覓鏤冰句

學福齋詩集卷三十四終

學福齋詩集卷三十五

雲間 沈大成 學子

竹西詩鈔

己丑新正上鐙日渡江同及門胡遜時作

又問瓜洲渡輕舟打漿回岸留殘雪在山帶晚雲開孤  
鷺隨潮去千帆入望來傳柑佳節近且把客中杯

元夕塗中大風雨

篷背潺潺雨從昏直到晨愁添歸客夢寒逼放鐙辰風  
幔江村酒烟蓑野岸人早梅曾坼未知勒幾分春

哭幼女

牽衣繞膝不離身誰料霜飛玉化塵

女沒於去冬十月

壯歲喪

兒同驥子

余有子一震才而蚤卒

衰年哭女作鰥人

小名抱珠

鍼箱字

篋俱成幻雨夕風朝總苦貧才到六齡傷短折歸來相對共沾巾

落燈後一夕諸及門雨中小集分韻得景字

昨宵已落鐙風雨依然猛淖深空巷泥寒添荒齋靜繙

歷望逢庚

占書久雨逢庚必定晴

翦帖虛燒丙學侶先後來牀敷

坐夜永康爵起相屬名言互馳騁藉茲一編書翫彼百

年景才章希劉揚意尙慕張邴寂寥會禪心浩蕩聞詩

境可耐前村梅將開東春冷好藉摘藻才爲寫橫牕影

和文山聳介字韻

江城積風雨似展大米畫寒齋羅壺觴翦燭共夜話何  
必百千鐙自有三十牯爲學須及時前途勉征邁所慚  
提羸師無能被堅寨諸君具逸才淵源溯正派願廣麗  
澤交蜚聲動江介檐瀑雖未休吾興豈爲敗

雨夜

七年賓館媿無能春暮重來百感增可柰風光銷積雨  
不堪心緒對孤鐙白頭橐筆仍爲客赤腳衝泥已類僧  
且任麗譙更欲斷老夫詩思尙騰騰

寄懷晴綺主人時在新安

別來兩月未淹留我到揚州君歙州春水綠浮征客棹  
晴山翠滴故鄉樓過家上冢添新什選勝尋幽續昔游  
獨有萍蹤寥落久短檠風雨伴牢愁

寄懷及門胡遜時淮安

扁舟別我去淮陰不覺經旬斷足音漂母廟邊應悵望  
枚臯城下幾沉吟長隄繞郭奔流急空館挑鐙坐雨深  
湖上桃花看落盡歸期何日共幽尋

春暮汪鈍叟招游湖上作

一櫂夷猶入水雲桃花因雨落紛紛客情今歲思前歲  
春色三分減二分蹀躞馬蹄穿柳去鉤輅鳥語隔林聞



舉杯我欲邀明月便放清光繼夕暝

筠榭舊冬去此久無音耗延佇增勞輒成長句

良朋冒雪何方去雁斷魚沉信莫傳隔巷尙留三徑宅  
全家俱上五湖船分題弄墨成前事闕酒徵歌記往年  
一樹桃花紅傍戶可憐榮落夕陽天

送吳杉亭舍人還朝

重入薇垣典制詞綠楊城外畫船移三年快論商高術  
君在揚注周鼎四座驚傳謝朓詩紅藥翻階趨省日朱  
竿經余爲之序幡照地出都時便分銅虎來吳越常共花陰鬪酒卮

張看雲行樂畫冊六首

鷺湖垂釣

湖水清於月湖魚白於銀仙人張志和消搖此垂綸念  
彼伐檀詩隱者全其真

洞庭探梅

花光并山色倒景入太湖扁舟破曉來置身在玉壺此  
境非人間滄瀛定有無

坐看雲起

觸石起膚寸濛濛堆白雲頓使積翠藏巖壑窅不分冥  
心觀物化超然離人羣

雲門吼瀑

飛流懸萬丈高瀉胸懷間偃仰者誰子長歎渾忘還清  
風灑塵壒芳躅不可攀

松陰夢覺

慈氏說夢奇春聲爲鼓響豈知奔松壽蒼寒愜幽賞欠  
伸神爲開一笑埽迹象

秋林坐月

明月出涼夜蕭森氣已秋零露濕人衣蜻蛚鳴不休拊  
時感吟懷萬事良悠悠

用李句

送江聿亭攜家歸歙

谷隱巖耕率弟昆攜家歸去樂田園清溪流水平高臨屋

黃海鋪雲直到門勝地重尋勞杖履故人閑過弄琴尊  
獨嗟相距今千里羈緒吟情孰與論

四月甲戌家椒園廉使重祀杜文貞於水香村墅  
分賦公事得檢校收稻

秋末霜初飛東屯稻已熟乘此天宇晴刈穫不嫌促黃  
雲割平畦壓擔雜種種露積茅堂前縱橫弛捆束旅人  
求一飽饘粥可粗足紅鮮嘗及時摩腹熙林麓

送陳笠山歸蘇州

衰白惜分攜江城雨似絲正當梅熟後又送客歸時體  
換新衣爽杯行濁酒遲良宵牽夢寐可憶故人思

六月廿四日雨中過朱草詩林詩弟子方婉儀以  
二絕句見質卽次和之

短筇倚壁卽呼茶急雨衝衢水沒車自媿衰年空學佛  
無能樹意說蓮華

搏土烝沙漫作型老猶爲客誤浮名衆流截斷無它屬  
香到梅花始是清

汪丹麓梅花小影

梅花吾所愛客游喜與俱孤山放蘭棹河渚停筍輿大  
庾逐征夫羅浮尋仙姝衰拙性寡合惟花共清娛偶然  
弄吟事往往頻操觚今年苦末疾瑟縮春蠶如聞說蜀

岡西新樹數百株安得呼健步咄嗟移坐隅汪兄忽闖  
戶巨軸自卷舒曰此行看子凍蛟噴明珠坐我瑤園中  
冷香襲衣裾澹月照花影微風吹花鬚氣象爾何物會  
神森須臾好景恐一失火急追詩逋美酒瀉千斛相與  
洗句乎汪兄出塵姿宜與梅爲徒冰雪充糗糧喁於作  
笙竽吾老吻生棘撻埴而索塗顧乃廁其間諸君莫盧  
胡盧胡大笑也  
見孔叢子

老友潘南湖應武漢溫憲副之招近聞去職年逾  
八十而漂泊無依爲可歎也雨夜懷之因寫長句  
人事天時兩並違始謀雖是計終非老還爲客猶難久

貧況無家失所歸，夢隔漢江波渺渺。愁增淮浦雨霏霏，不知何日重相見。共把深杯話息機。

高密宮守坡過

回憶禾中別經今，又幾秋異鄉重握手。話舊涕橫流，風雨連千里。琴書共一舟，好詩傳海寓。何用覓封侯？君以詩集

見遺并索拙序

哭黃北垞

窮人從古說，因詩不幸先生獨。擅之妻子何依，身後恨

近聞真州汪君曉巖獨力收卹之此種高義洵古人也文章無託眼前悲，兄刻存沒絕句

三百首余曾爲序小樓鐙火成前夢，孤艇風濤有幾時。今恐不能竣矣。

更憶紅橋游晏日不堪回望淚交垂

玉屏歸自武林同集晴綺軒分韻

頻年契濶喜相尋倦鳥知歸返故林  
迢遞青山羈客夢蕭騷白髮故人心  
亂蟬深柳猶烝暑積蘚虛堂尙帶陰  
從此好爲河朔飲東醪一醖滌塵襟

焦五斗焦山圖

吾讀裴松注隱者焦孝然遯厥所生鄉  
其先河東人弱冠避白波在漢中平年  
曾聞客揚州娶婦乃西還豈意結褵時  
往來江上山崎士若鸞鳳羽儀容莫攀  
爰以焦姓山千古仰孱顏裔孫曰五斗  
鯨飲吸百川肥遯亦不



出終日抱芸編曠懷隘四海傲骨青銅堅雅好山澤游  
願與麋鹿羣羣然跂祖德作圖規前賢庶以當羹牆朝  
夕奉周旋一旦忽失去寤寐心魂懸有子才且孝卓犖  
工詩篇偶入揚州市此卷宛在焉數所矩切錢買之歸楮  
墨仍完鮮父子大拊掌歡喜動里隣徧乞知交題錦繡  
何編爛幾時呼吾友同登焦山巔滄溟望不極白浪遙  
吞天蓬壺在有無揮手弄雲烟載歌祝衎歌高風超邴  
原

新秋雨集晴綺軒同竹樓雪礪橙里作

積陰忘過夏今夕已秋天

是日酉時立秋

雨氣平沉屋江湖遠

入田望鄉愁儉歲問疾感衰年時初病起且盡尊中綠昏昏

一醉眠

七夕病起禮門石滄雪礪兩峰玉屏大雨中集學

福齋分韻

一昔秋風掃病魔

先一日立秋

又陳瓜果共高歌壓城雲氣

連天合殷

於謹切

地雷聲挾雨過但覺銓前蛩語砌豈知

空外鵲填河同心容易常相聚浮白何嫌百盞多

時玉屏初

至而禮門將歸

大雷雨後玉井禮門牧田雪礪及晴綺主人共拈

秋字

阿香車過電初收  
高館開尊接勝流  
草際螢流三徑晚  
牆陰蟲語一庭秋  
涼生漸覺衣裳薄  
老去偏驚歲月遒  
極目暮江湖正盛  
天瓢莫再瀉無休

處暑日集項小溪新居

秋風驅暑去亭館  
有餘清斜景猶未匿  
林蟬時一鳴銜  
杯動吟興讀書見  
幽情早晚霏黃雪  
還來池上行

重送玉屏之武林

相逢未久忽離羣  
把袂逡巡又欲分  
莫以綈袍憐范叔  
終當連騎識蘇君  
國策轉轂連騎  
炫燿於道  
杯行酒墮天邊月  
風利帆飛江上雲  
此去南屏楓漸赤  
好將詞筆賞斜曛

學福齋詩集卷三十五終

學福齋詩集卷三十六

雲間 沈大成 學子

竹西詩鈔

中秋前五夕雨後月出鶴亭主人置酒前楹同嚴  
果亭陳對漚集飲作

疎雨初過旋放晴白雲微吐半輪明莫嫌零露沾衣濕  
欲挽長河入酒傾良夜官孤賢主興深談尤見古人情  
幾時得共西湖上醉喝銀蟾使倒行

杭堇浦太史自武林以漫興三首索和因次答之  
東南風雅待扶輪管領西湖無限春大筆淋漓真學士

高懷蕭散古仙人前塵已忘曾朝隱長物惟思有客貧

吾友江玉屏僑居湖上賴公以濟鐘鼎山河俱自得分明重見樂天身

豨膏漫說潤車輪何處還尋邗水春市上幾聞騎鶴客  
墻東空見叱牛人縱逢郭解難爲使未是黔婁也患貧  
衰盛都來供一笑祇應齒落作坊身

衰老駸駸欲繫輪可堪孤負幾番春青雲久墜干霄志

白首仍爲時術人病中惟校儀禮濁酒但求終日醉枯毫難療

一家貧行年七十猶爲客贏得維摩問疾身

爲儀徵尤貢夫詠蘇文忠石銚卽用原韻

好試中冷江腹泉鼎鑄何似此銚寬松枝自可煎湯熟

石氣寧愁助水寒但瀉一甌偏得味便傾七盃肯教乾  
坡仙留共詩人飲所媿聯吟句未安

劉師服聯石鼎詩或訝短尾銚

### 左手拘攣作

一肢成末疾垂老更艱辛自笑無全馬餘年作半人著  
衣恒掣肘持器每含顰莫道維摩詰誰爲堅固身

維摩詰經

是身如芭蕉樹而不堅固

秋分後一日偕俞楚江徵士訪桃花庵主石莊由  
畢氏園至三賢祠看桂歸舟聽晉陵王山人香瓢  
縱談所游山水之勝蓋遍天下矣酒間得詩四首  
白帝趣征轡秋風倏已分相攜素心侶散策城北門河

湄呼小艇左右羅琴尊我樂信正多造物與我閑窈窕  
入林壑欹側狎波瀾曉暝闕亭榭轆轤周圍樊遂湧迎  
恩湖因訪竺道人桃葉黃欲落把茆翳白雲窓外有秋  
花向客殊嫣然自覺鋪錦麗安美烝霞鮮真妄果何著  
圓通亦無端我非許元度相對還忘言

威遲上平岡秋光入遙睇小徑若脩蛇脫葉紛填委曰  
此有名園園中多青桂連崿勢撐天高欲出無際林立  
數百株藹鬱交堆翠我來秋漸深黃雪已滿地羲御爲  
之停偶漏日光碎雜坐亂石間足罷喜暫憩何當呼香  
巖快論第一義花開園爲開花落園仍閉主人困塵勞



到此良不易逡巡出門行遠山露青髻

昔爲詩人墅今爲詩人祠墅者問爲誰太史系沙隨

祠爲

程午橋太史篠園花時觴詠於此

祠者歐與蘇漁洋實配之春秋薦蘋

藻肸鬩宛在茲其隙植老桂何翅數萬枝露泣黃瑣碎  
風吹綠參差當日花開候勝引先後來廣庭圍燭樹深  
宵弄金卮有時弦管沸或見千旄馳豈知驚流電花是  
人已非履綦何處尋片碧留習池惟有篋中詩千古不  
爲埋一彈雍門琴念之抱餘哀

暮色暗林樾歸舟載夕陽主人醺名酒相與翻巨觴僕  
病不能飲母乃咄其起坐客有王生三爵神揚揚自言

少好游述之猶能詳西行至身毒北宿流沙傍南娛極

滇楚遂竝

讀蒲浪切

越檣疆所恨出東海未得探扶桑五嶽

在俯仰九藪亦回翔入棧百盤細下峽千丈强或蹈罷

虎窟或拂星辰行

讀胡郎切

或餐松栢實或吸沆瀣漿何恃

乃無恐忠信爲周防吾聞古夏革

音棘

能知游之方亦有

列禦寇新境恒不忘聽生今夕譚郭酈快同堂莫笑閉  
戶者其迹若風迹吾游在載籍亦足窮八荒

### 小春廿五日七十自壽六首

我年交七十屹屹尙治

澄之切

經曉日半窓白昏燈一穗

青漫宗高密學敢擬子雲亭差喜同心侶猶能環坐聽

我年交七十餘事祇稱詩香草懷君子停雲寄所思  
詒  
癡嗟竟似風雅勉強難追倣帚原無用寧期牙曠知

我年交七十遣興託壺觴促席呼齊贅銜杯睨杜康  
新  
簌香易醉重耐味尤長連日飛霜冷東籬菊更芳  
菊之貴種

立冬後始花

我年交七十尤嗜在梅花河渚冷猶憶羅浮夢未賒  
在

嶺南梅花幾枝微雪觀半樹凍雲遮苦愛名園裏垂垂

春水涯  
鶴亭主人淨香園梅花最盛每與賓客觴詠其下

我年交七十不倦是山游直欲闢丹穴何當醉石樓烟

霞容獻傲巖壑卽夷猶他日尋台嶽須登最上頭  
天台物公

來約石  
梁之游

我年交七十息意學安禪貝葉多生業蓮華淨土緣三  
身宜抖擻一勺豈唐捐結習應除盡方知教外傳

送俞楚江之蘇州

豈易逢知己胡爲頓別離飄蓬原不定分袂已相思極  
浦看帆影深宵費燭枝山塘梅欲放握笑蚤春時

輓谷水院主王聲萬鍊師幼時同館生也

小小入鄉塾垂髫憶肩隨我讀后氏禮君誦毛公詩君  
意取刻苦課程每虞稽我幼性儻莠蚤歸從游嬉院有  
紫薇樹一日上幾廻君則敷襟坐默然百不爲旣長各

散去相望天之涯我爲緇塵客君爲黃冠師君精大洞  
錄社鬼皆受治殛魅雷豁落請雨龍躩踞以是業日起  
中興谷水潛召匠庀材木饅人饅以泥爲樓醺星斗呼  
吸拂參旗上帝儼高居百神森羽儀嵒嵒青羊宮彷彿  
移來茲

院有老君堂

此院久就圯賴君克復之靜治有所託

其功誠不訾君乞余爲記媿乏瓊琚辭去秋自揚返君

爲羅尊壘琅邪兩伯仲

謂世綸孝廉史亭太史

集飲桂華時爲言

同學事拊掌起而哈昔者氣吞虎今看髮垂絲十六昔  
何壯七十今何衰壯衰若轉燭前歡胡能追誰意子月  
歸君病已難支信宿卽聞逝思之淚盈衣忽忽六十載

回首流電馳黃老真欺我天壽同一歸服食求神仙長  
生不可期駐顏究何效蕭蕭白楊悲吾取莊叟言委蛻  
棄若遺君能一死生大暮未爲非若念童卯交君其醜  
我卮

庚寅新歲作

十年江上飄蓬客今歲屠蘇喜在家儕輩定應嘲飯顆  
老妻猶爲頌椒花墻根積雪雖含凍庭際寒蕪欲放芽  
但得安閑親典籍須知黃卷勝青緇

山塘訪俞楚江不值

初移元亮宅盡識伯休名詎料橫江去徒深倚櫂情市

橋鐙乍落山寺雨新晴過客添惆悵嚶嚶春鳥鳴

京口阻風

北風一吹萬舟阻大魚跳擲江豚舞塊然兀坐五日過  
吾生連蹇奈何許地主紫薇蔣舍人謂春農頻遣長須餉  
酒脯水渴舟膠不得前往往隔岸遙相語前船未動後  
船來舳舻塞路若螻聚去年入春憂滂沱今年開正苦  
少雨嗟余客久中寒濕出門疾作腫左股斲昏偃臥局  
船艙卻羨鳥鳥高企舉蜚廉侮我太哆張不使船艤起  
搖艫絕好臨江黛色山何妨日日醉江渚

喜江雲溪攜家重至廣陵

握手重相見驩然慰索居無多新僦舍卻滿舊藏書春  
酒才筇後梅花正放初玉田詞興在還共狎樵漁

高密宮守坡自杭歸里冒雨過存出示續集因題  
拙句卽用集中過汪漁亭東軒所次蘇詩介亭餞

楊次公韻

蹢躅病足久杜門羈客離索宛荒村楚然喜聞故人至  
肴覈墳素窮竝源一春少雨今忽雨疾雷殷地驚傾盆  
俯仰聚散付昔夢指顧枯苑成陳糧快讀新詩起擊案  
良玉孚縛謀尹思尹切來堅昆君才何止霸齊魯浩倡直  
欲鳴乾坤韓蘇把臂得直訣莊列啓口皆寓言悠悠千



載同一快我輩焉用分輕軒

失猫

旅舍雖多鼠頗猶能捕之偵巡周屋相守望闔門扉餅  
嬰侍餘糧橈架挂鮮衣晝則臥書案宵還入被池緣樹  
捷上下登屋狂奔馳卒伺蠶蜨便每從童奴嬉但欲饜  
池魚何嘗竊隣雞善會王人意絕勝舍中兒去冬偶南  
返暫以寄朋知今春重到此搖尾情依依鼠輩頓曹跳  
鼠伏齧前威撫弄置懷抱馴擾蹲庭階豢養恩豈忘莫  
言物之微一昔忽無聲起尋生狐疑或云爲人篡應見  
碩而肥或云羽毛豐禍且及其皮羣居苦衆雜盜者知

不學莊子集卷三十一  
是誰猶冀同我愛密室尚繫縻庶幾得縱釋自來終有時不然鼠復橫叢藪交營私穿墉遠窺窬出穴羣喧厯我其奈若何聊以寓諸詩

蠲蝨

吾老猶爲客無乃蝨其間

用韓詩

庶物感氣類蠕蠕來沿

緣初生微爲蟣旋化多如蜾信宿伏難見旬日滋成屯

或且處視中竟可緣領邊出沒妨晝坐疴癢擾夜眠幾

費嵇康搔還勞王猛捫居然踞肘腋蠹爾蕃子孫

見抱朴子

徒博笑牛蟲善撮慕狙獼嚼齧詎可忍殘殺寧有寬晨

起呼童奴卷衣就窓前蒐索拆縫紉窮追翻絮綿齒摩

更瓜拍几案漬血殷醜類斯須盡快意何可言因憶在  
家時中衣澣濯勤以是恒潔淨從不留垢塵出門雖未  
久奄忽遂莫春么膺敢肆虐狼籍衣被痕今喜得洗蕩  
作詩報家人回頭囑童奴湯沐休辭頻

### 病足

廣陵地卑濕往往足易病甚或致跢躄偏亦苦楚

丑例切

躄苦楚切

客此近廿年雙腳幸尚勁曲踊夸健兒吾老能

濟勝豈意中之久終當乘不虞新正在鄉里微遂爲歡

娛突然左股間腫起浮漚如刺之流縷血一昔仍完膚

束裝遂出門弭櫂泊姑胥故人留我飲

謂惠二乘高

爲我烹

鯀魚此物我宿嗜沾箸鮮且腴重以故人意飽噉盡無

餘厚味果爲患所苦復鵬張滋蔓貳乃橫其勢連膺市

切腸拳跼不能行偃臥體欲僵痛癢須抑搔動靜皆扶

將爰罷析津游鶴亭主人本約還向蕪城住幾番迎瘍

醫毒藥徒教聚剗殺技兩窮不可以韞屨宛成遷延役

無乃若曹誤況我非褚師亦非孟縈弱煎湯勤沃洗裂

帛牢束縛終日躋去遙切翅一足也而坐矐我亦太虐梅花旣

失期看桃仍爽約甘肱多禁忌斷酒謝觴酌賴有良朋

來清言破寂寞

久不得戴東原音耗近知主席河汾詩以懷之

嗜古窮經最重君，卻教講學向河汾。  
雅琴獨奏難爲聽，野鶴高飛自不羣。  
驕客尙懸畿輔夢，遠書猶隔太行雲。  
年來疑義知多少，揮麈何時到夕曛。

得袁簡齋明府書因寄

江上傳良訊，兼金入手來。  
殷勤勞慰藉，老眼頓爲開。  
迹似周顒隱，人推庾信才。  
君工駢體幾時尋別墅，共醉白雲隈。  
君所居隨園在雞鳴山之陽

簡程魚門舍人

實學今稀覩，此髯真不凡。  
藏書知舊富，洗句見新芟。  
君自編詩集屬序華省翻紅藥，精廬署綠杉。  
君將移居吳中自憐同嗜好

未敢辨酸鹹

送宮守坡歸

仍爲客裏別分手念前期況值春歸日何堪病起時長  
河千里夢落月幾篇詩海岱遙延佇迢迢繫我思

學福齋詩集卷三十七

雲間 沈大成 學子

竹西詩鈔

四月望前一日金樓亭廣文招集湖舫以杜詩我能拔兩抑塞磊落之奇才分韻得我字

蜚廉連日狂土囊張以喫良友招出遊一葉輕飄舸次

第歷園樊萬木高樞

來可切 樞鳥可切

紅藥正盛開旖旎豔

階朶移舟入硯池登岸訪粲可

同人有至秋雨菴訪僧竹溪

吾病不

良行策杖猶尪尪二三老吟朋相與蓬底坐嚶古頓心

開樹意豈話墮佛言人非人自笑我忘我鄒爽詫雕龍

齊髡夸炙輠夕陽澹欲沉曰歸起船舵林筍玉圻胎槃  
櫻珠堆顆連飲數十杯不覺衰顏酡待可切扶醉入城來  
滿街爛鐙火

首夏同人集徐菴農齋中以謝詩首夏猶清和芳  
草亦未歇分韻得首字

良友知病差爲我置名酒恰當雨初晴微風入戶牖深  
紅插瓶花新綠隔牆柳高齋淨無塵何異居林藪多君  
曠世才藉甚公幹後半偈可洗心一編不去手古澹得  
吾宗蕭散離諸垢偶集必稱詩落筆埽窠臼逡巡百篇  
成觸目羅瓊玖自笑學華嚴無能證賢首當杯或繼聲



鈍拙類誦帚

秋雨菴主竹溪招同牛頭德公寶輪龍公茶話有  
作

吟情游興久唐捐邂逅精藍亦偶然少把青編唯嗜學  
老依白拂欲安禪三身知喻終爲幻一勺能嘗便是全  
行腳過堂原我分只愁空費草鞋錢

汪對琴招集新遷安雅堂以韓詩門以兩版叢書  
其間分韻得叢字

吾友闢精舍卽在舊宅東折簡以落之觴詠於其中初  
夏櫻笋熟豔發紅藥紅鴉鵂雖已鳴促席猶芳叢連日

雨腳收麥隴交清風江村餅餌香餅粟無虞空況多文  
字飲操翰從羣公自媿老而鈍安能脩辭工所遇皆詩  
豪高歌塞蒼穹吾獨摩壘還取笑同學翁用杜句 同  
人皆卽席詩  
成而余  
歸始作

送家椒園觀察入朝

鑿江頻歲思空切

自主席真州數  
欲往訪不果

河渚今春願又虛

新

武林故人約看梅  
花以來廣陵中輟

喜聽方舟將入

覲好持卮酒慰離居殷勤共繹前賢緒鄭重閑論善本  
書況託宗支兼宿好臨分抗手悵何如

祝釐

聖節赴明光廉使仍參鸛鷺行碩望

朝端傳諫草大科海內誦文章門墻半屬金閨彥堂構  
爭夸畫省郎此去雙旌經海岱馬蹄到處蔭甘棠

張漁川五兄招集秋雨菴食笋以王摩詰詩南園  
露葵朝折東谷黃梁夜春分韻得折字

把茆深綠中禪扉終日閉昨訪法侶來今爲良友挈曉  
堂動風旛粥鼓猶未絕簌簌森以蕃夏筍尙蟠結擁腫  
有哺雞尖銳若剛鐵

哺雞笋剛鐵頭皆  
江南四月笋名

旁出石失堅初

生土爲裂緻緻玉膚藏層層錦綳蛻味美舌頓甘質嫩  
手可折焉用求芝菌底須慕腥羶

祖悅切

和之以薑鹽香

鮮實可悅言念稽阮徒禮豈我輩設坐久日氣烝解衣  
祛煩熱相與縱高譚或爲舉脰說往往雜談諧捉塵落  
毛屑吾獨話苦空妄希釋羈紲煨芋熟牛糞何如煮笋  
潔舉似竺道人莫笑老更拙

自秋雨菴放舟至三賢祠轉入汪氏園觀芍藥呈  
漁川五兄

飯罷棹野航盡往觀芍藥沿流至荒祠花事頗零落俯  
仰生感喟舊游得約略一掬峴山淚拊迹增寂寞去去  
入名園振衣登高閣俯視翻階花萬朶光條燦卽看衰  
盛殊不覺爲停腳此豈狎紅紅彼寧悼灼灼徒牽雍門

悲已失大隄樂始知諸有情變滅足駭愕何必求多藏  
曷用慕高爵不如一柔翰可以恣揮霍況有同志友相  
與勉述作如是心寶雲無住亦無著世諦一埽空微尚  
庶有託

徐菽農齋會送沙斗初之楚中

共舉離觴送故人江邊愁折柳條新潮推落月辭瓜步  
風挾高帆入漢津傍岸市聲喧遠近上樓山色接嶙峋  
到時正值荷香起遙羨題襟得句頻

重五日橙里六兄招陪越門郡伯自紅橋泛舟至  
平山堂酒閒作

紅榴灼灼柳重重佳節天中復此逢耐可扶筇陪五馬  
來看競渡戲雙龍沿隄聯轡游人盛促席飛觴飲興濃  
微月林端才漏影嚴城未闔許從容

春藻堂集飲有懷聿亭三兄

華堂高會厠嘉賓共憶東歸舊主人兩地風烟千里夢  
一年時序幾番新

時將交夏至矣

好山到處隨吟屐活水無心

引釣綸爲是良朋偏在遠停觴不御重逡巡

何鐵山張看雲凌叔子汪對琴江松泉雨集學福  
齋以柳綠更帶朝烟分韻得綠字

梅雨苦不休濕雲失晨旭故鄉來密親逆旅招近局入

市求菜鮭開甕倒鄴淥萍踪旣飄淪塵勞亦局促假此  
片刻閑聊以一觴屬客舍寂無人蕭岑若巖谷庭蕪陷  
屐青牆薜侵裾綠可耐雨又來檐鐵鳴相觸客起各賦  
詩嗟嗟粲羣玉

題桂林相國與白大夫手扎後

錦贍犀軸裝池堅赫蹏墨光何熊然相國手扎語鄭重  
尺一飛墮青雲端言念大夫來邗上正當相國巡吳年  
治績日著士心悅萑苻屏迹枹鼓閑干村月白犬不吠  
百城柳綠昨皆安奏記幕府如指掌相國嘉賞辭加溫  
秉公持正勿矯激

相國札中語

相期培護滋本根唯賢知賢

豈易覩文昌流曜迴星躔

六月八日程魚門舍人招同閔玉井張看雲凌叔  
子江賓谷汪對琴湖上納涼作

扁舟容與載湖光依約荷香坐畫廊聊避炎威來靜境  
頓辭火宅入清涼前因重憶驚心久舊侶相逢引話長  
梓澤蘭亭俱是夢好風吹醒釣魚郎

七夕後二日魚門對琴松泉集學福齋魚門卽席  
有作依韻奉酬

秋雨初過洗六街良朋握笑慰羈懷老耽懶散翻宜病  
醉愛狂吟不厭俳十笏漸於禪侶熟一編閑與古人偕



西來祖意知誰會  
庭際木樨香滿齋

筠榭去揚三年久  
斷音耗近於晴綺軒中見其柘溪漁長詩因次原韻懷之

扁舟一去歲月長  
相思風雨如連牀  
三年不見我良友  
遠書鄭重不得將  
此詩何來爲狂喜  
乃知近住烟波裏  
大筆淋漓墨采飛  
深杯瀲灩珠光起  
移家泛宅柘溪頭  
樵兄漁弟殊風流  
何必滄洲始長往  
卽茲清泚堪淹留  
丈夫生世取自得  
澤雉飲啄寧多求  
柘溪之曲碧澗濤  
荻蘆葭蕀帶荻蔣  
我欲牽船訪故人  
好待明年春水長  
秋夜鶴亭主人招陪吳魯齋明府暨對瀝秀峰樓

亭石恬諸同學卽以所遺韻箒分賦得曷韻

四聲如排籤林立簡而括氏之曰韻箒隨意引手拔詩  
罔蒐難窮詞源濬莫遏一叶驪珠探累疊僚尤脫蹊爭  
李杜長氣使曹劉奪吳侯大雅材風騷入三昧莫擬製切  
此便取攜竹光翠疑活投贈視琅玕百七步可掇主賓  
皆健者高興發箭筈遇夷獨出奇履險巧迴幹吾老苦  
思枯書空徒咄咄吟成倒巨觴庶解渴羌渴

鐵簫歌爲如皋林九標作

銅山崩湘竹裂那及林生一段鐵漸離筑子晉笙林生  
之簫作鳳鳴洞庭老龍凍不死化作短簫堅若此千年

沉沒鱗甲亡一昔飛騰雷電起林生得之胥井中青泥  
闕塞塵孔封磨洗煩擗發光澤繡花遍視生晶熊懸於  
牀頭百怪遁吹來月底羣仙逢林生四十猶布衣詩筆  
老橫垂烟霏濃睂廣顙氣吞虎五陵豪俠相攀追信陵  
平原今不見白頭屹屹守筆硯不如去逐山澤游浮雲  
富貴奚足羨我聞在昔楊鐵笛後四百載林鐵簫一簫  
一笛兩奇士秋風秋雨客蕭條

送魚門舍人還朝

鼓枻橫大江秋風壓帆席小泊石頭城便尋洛陽陌此  
邦多古意山川助筆力北邁渡黃河迢遞歷數驛西風

卷巖霜曉日原上白去去入長安重踐鳳池迹同省皆  
英賢揚馬互推激明年上春官臚傳

聖人側妙譽動南宮文采照東壁繫余苦樗朽漂轉猶  
爲客握笑半載來譚蓀快莫逆荒言藉芟芳疑義賴扣  
擊自幸關夷塗浩蕩了不隔尙當策衰景感奮追虎脊  
終收一溉功經畚老亦得惟盼雲端翮竊覲破愁寂勿  
使菰蘆中相思晨夕積

哭亡友俞楚江用王摩詰哭殷遙韻

邂逅得良友三載交忘形豈知一分手永訣傷我情白  
日無根株人壽少百齡所悲淹逆旅子規含哀聲遺詩

數千篇可以稱善鳴空山斷人行寒泉瀏且清如何坐  
偃蹇奔走徒半生入口寄幽薊萍梗嗟無成老淚漉吳  
天中心爲不平寂寥掩總帷秋雨荒柴荆

九月二日過二嚴精舍分色字

中林霜欲飛北風起寒色刺船渡河來精藍共宴息黃  
華已吐葩冷豔粲可卽仰視浮雲端賓鴻厲征翼勞勞  
逐逝波人事無終極庶尋塵外蹤宗雷計殊得緊余航  
華嚴兼學成唯識悟彼心性宗飽此禪悅食

武林周烈婦輓詩

烈婦老友嚴漱谷之冢婦廣東陸豐縣巡檢檉

之妻也。裡病瘵卒，官婦攜持孤幼，奉喪歸浙。天盛暑，路經廣州，積哀歐血而死。

夫婦旣交禮事之，卽如天天崩生，何賴誓死從黃泉。蟲蠹海上暑灼灼，嶺頭雲手提呱呱兒，萬里隨一棺戴星而過市，淚落不曾乾。以茲病歐血中塗，軀同捐白雞啄素旗，旅櫬雙雙還相彼連理樹，肯爲單栖鸞死生終不渝。大節何懷然。

鈕牧村別去五年，重過廣陵，詢知歸自滇南。今又將往大梁，猥蒙贈詩，卽席奉答。

人似王摩詰詩，兼孟浩然三河重策馬，六詔一歸船。風

義無今昔分攜有歲年梁園寒雪盛衰柳古城邊

送汪對琴赴選入都

暫辭經席赴神京琴劍脩嚴襪被輕卽見含香開省署  
爭傳倒屣動公卿馬蹄一路春山嫩雞唱三更夜色清  
正值栢梁高宴日相如詞賦舊知名

學福齋詩集卷三十七終